

Forum cultural Tujetsch

10avla radunonza generala dils 19.10.2007
Hotel Krüzli 7188 Sedrun

1.Beinvegni: Allas uras previdas arva il president André Schmid la radunonza cun far in cordial bienvegni a tuttas 14 personas presentas. Schau perstgisar ha Conrad Berther.

2.Dumbravusch: Sco dumbravusch vegn proponius ed eligius: Tumaisch Valier

3.Protocol: Il protocol dalla 9avla radunonza generala vegn prelegius ed era approbaus senza neginas objecziuns ni midadas.

4. Rapport: Uonn ei quel buca staus presentaus ordavon en la Tuatschina. Per quei ha il president era repassau gl'entir program alla radunonza: Cheu entgins dils pli marcants puncts dalla lavur prestada dil Forum:

- Avon 10 onns han ils iniziants Tarcisi Hendry, André Schmid e Bruno Berther clamau ensemen interessents e fundau la nova uniun Forum cultural Tujetsch. Suent 10 onns astgein nus mirar cun plascher anavos sin la lavur prestada. Pli bia fiasta dat ei buca, denton vegn quei tiern marcaus cun l'edizium dallas ovras da Pader Baseli Berther da Dieni (1858-1931).
- L'inschigniera Ursula Scholian ha ediu in niev cudisch da Pader Placi a Spescha. Il cudisch tracta il svilup digl uaul ella Val dil Rein, pia era nossa vischnaunca. Ussa preveda ella l'edizium dalla scripziun dalla Val Tujetsch da pader Placi. Il Forum ensemen cun Norbert Berther e Toni Schmid han tractau la damonda da sustegn e suttamess quella alla vischnaunca. L'edizium cumpara igl onn 2009.

- Cudisch da Cavorgia: A caschun dalla usitada sentupada dils da Cavorgia ha dunna Cecilia Hendry-Schmid ediu in cudischet sur digl uclaun da Maunsut. Quei ei bein in grond scazi ed igl ei da gratular a Cecilia per las bregias e per sia curascha. Il Forum ha susteniu il cudischet cun ina contribuziun.

- Faner a Mulinatsch-sut: Felici Deflorin ha manteniu siu faner a Mulinatsch sut e curclau quel cun in tetg da slondas. Tals objects fan biala parada en nossa cuntrada e dattan adina puspei perdetga dil barahar da nos perdavons. Era quei project ha il Forum susteniu.

- Notg da films 2007: Per la tschunavala gada havein nus organisau la sera da films. Uonn eis ei era stau pusseivel da mussar quel ora el liber. Stau freid mo la speziala atmosfera ha recumensau quei. Mussau ei vegniu la revista 2006/07 - il secund film ha mussau tratgs ord la tschentada da cumin dils onns 1933 cun il mistral Vigeli Berther da Camischolas, - il cumin da 1971 cun il davos mistral da Tujetsch Teofil Schmid e la tiarza sequenza maletgs dil davos cumin dalla Cadi, cura che nus havevan mustgas da metter Vigeli Giossi sin la buora. – Il tierz film ei in project accumpignont tiel studi a liung temps entras igl institut per survetschs publics e turistics dalla scola aulta Sogn Gagl.. Quel ha mussau il scolar Fabian Deplaz en cumparegliazium cun il svilup e las midadas caschunadas entras il plazzal da lavur dalla NEAT. Cun rodund 150 visitaders havein astgau nudar danovmaein in tschec diember.

- Calender 2008: Era per igl onn vegnent havein nus preparau in calender. Maletgs ord la colecziun da cartas postalas da Adalgott Berther da Rueras/Dallenwil vegnan presentai quella gada.

- Casti da Putnengia: negina lavur vid la ruina a Satur denton procurau per differentas lavurs da preparaziun. La finanziaziun ei per gronda part garantida, aschia dess ei esser pusseivel da saver cuntinuar e finir las lavurs da restauraziun e conservaziun.

- DGR: Felici Berther da Rueras/Sursee ha regalau al Forum igl entir Dicziunari Romontsch. Quel contegn 11 toms e 5 faszichels. Engrazia fetg a Felici per quei grond schenghetg ed era per il mussament da sustegn da nossa uniun.

- Ulteriur: ils 14 d'avrel ha la televisiun Romontscha presentau la premiera dil film "Sontga Barla ed autras dunnas" in film da Bertilla Giossi. Il schefredactor Mariano Tschuor ha fatg attents che paucas vischnauncas posseden in tal scazi da documents da radio e televisiun sco la nosssa.

Alla fin dil rapport engrazia il president a tuts e tuttas per il sustegn ed interess. – Ils presents approbeschan il rapport cun far in ferm applaus.

5. Quen: il cassier Tarcisi Hendry presenta il quen che vesa ora en cuortas tratgas aschia:

Survesta quen ordinari:

Entradas		25'647.80
Expensas		19'020.50
Fatg anavon		6'627.30
Bilanza:	Saldo dils 18.10.2006	12'445.20
	Saldo dils 15.10.2007	19072.50

Fatg anavons **6'627.30**

Survesta quen Conto Putnengia:

Total entradas (2003-2007)	160'251.30
Total expensas	119'954.30

Saldo per 15.10.2007 **40'297.00**

Barla Monego ha repassau il quen e ha saviu comunicar che quel ei menaus endretg e schuber. Tuts mussaments segien avon maun. Ella propona alla raspada d'acceptar il quen sco mess avon e dar scarica ed engraziament alla suprastanza per lur lavur. Quei han ils presents era fatg, puspei cun in ferm applaus.

6. Contribuziuns: Sin proposta dalla suprastanza vegn la contribuziun laschada sco ils onns vargai. Norbert Berther havess il giavisch ch'ei vegni differenziau exact denter commembers e fautors. Il cassier ha saviu dir che quei ei gia vegniu empruau ed era fatg. Mo ei vegn buca cruschau sils fegls da pagament tgei e con ed aschia eis ei forsa meglier da schar sco tochen da cheu.

7. Elecziuns: Igl ei puspei in onn da elecziuns. Bruno Berther seretila sunter 10 onns engaschi. Ei segi era temps da dar la pusseivladad ad autras persunas ed aschia tec a tec midar ora la superstanza. En la persuna da Nicolina Cathomen havein nus anflau ina premurada ed era engaschada persuna. Ella selegri d'astgar prender part da quei gremium e laschi bugen tener era sch'ella sappi buca esser presenta quella sera. Aschia eis ella vegnida elegida unanimamein ensemen cun André Schmid e Tarcisi Hendry che stattan vinavon a disposiziun. Medemamein reelegida vegn Barla Monego sco revisura.

8. Projects: Tarcisi Hendry ha presentau igl prem tom dil cudisch da "nies" pader Baseli Berther. El ei staus per nosssa val, per la cultura romontscha ina impurtonta persuna. Cun siu

rimnar e far attents sin il grond scazi da cudischs e rimnar quels ha el mess bia cultura en moviment. Egl emprem tom vegn tut quei che ha da far cun Tujetsch ediu, in secund tom dess tut quei che pader Baseli ha rimnau sur digl ulteriur intschess dalla Cadi, en spezial sur da Mustér e Medel. In tierz tom fuss lu aunc pusseivels cun la bibliografia, ev. brevs ni outras scartiras avon maun. Igl emprem tom cuntegn 224 paginas, vegn edius en 500 tocs per in preci denter 30-40 francs. Il president André Schmid sa communicar ch'il cudisch vegni presentaus a caschun dina fiastetta nua ch'era la biblioteca da Vic Hendry vegn presentada el niev local sin casa da scola.

- Ulteriurs projects ei la continuaziun dallas lavurs a Satur vid la ruina da Putnengia
- L'excursiun enta Val ei vegnida pustada igl onn vargau muort manco d'interess. Uonn vulan ins danovamein scriver ora e mirar sch'ei dat dapli interess per far quella viseta.
- L'uniun dils Gualsers ha interess da far ina scuntrada en nossa val.
- Notg da film: Vegn cuntinuada.
- Senda romontscha: Sin iniziativa dalla MGB e SedrunMuster turissem ein ins vidlunder da crear ina senda romontscha atras nossa val. Quella entschavess enta Rueras e menass tochen sils cunfins o Bugnei. Sin puncts interessants ni strategics vegness montau ina tabla che raquintass sur dalla historia, sur da schabetgs ni eveniments schabegiai en quels loghens. Lu sin mintga tabla vegnessen era entgins plaids romontschs amplificai per far attents e confruntar ils visitaders cun nies bi lungatg.

9. Varia: Sut varia astga Bruno Berther retscheiver in bi schenghetg en fuorma d'in canaster pleins da bunas caussas ch'el ha priu bugen encunter. Era el engrazia per la buna colaboraziun en quei gremium, giavischa vinavon buna lavur ed a tuts ch'els sestentien vianvon per nossa cultura.

Vulend negin auter prender il plaid ha il president saviu serrar la radunonza e givischar a tuts in bien retuorn a casa e sinseveser in auter onn.

Rueras, 26 d'october 2007

Igl actuar: Bruno Berther